

Иса Месигъ бабкан хъуб

1 Думу йигъари Авгъуст кІуру Римдин паччагъдин чан вари ругариин али агъалйир гъисаб апІуз амур удубчІвну. 2 Му Квириини Шам вилаятдиъ паччагъвал апІурайи девриъ сабпи гъисаб вуди гъабхурайи ляхин вуйи. 3 Гъаддиз вари, чиб дикІбан бадали, гъарур чан шагъриз гъушнйи. 4 Галилей уълкейиъ айи Назарет шагъриан Ягъуди уълкейиъ айи Давуд бабкан гъахъи Вифлеем кІуру шагъриз Юсуфра гъушну, фицики думу Давудгъярин тухмиан вуйи. 5 Думу чаз хъирснайи ва гъагъдиъ айи Мар'ямдихъди чиб дикІуз душнайир вуйи. 6 Дулар душваъ айиган, Мар'ямдин бицір шлу вахт улубкъуру, 7 ва дугъу чан сарпи велед — Бай апІуру. Думу ччаппаригъян гъидиржну, ахъиъ айи тІунаъ дитру, фицики дулариз хълар дергру хуларий йишв ади гъабхъундайи. 8 Гъадму уълкейиъ йишвну чюлиъ, чпин сюрйирин гъаравлиъ ади, марччлихънарра айи. 9 Сабпну дуларин улихъна Агъайин малайик гъюру. Агъайин гъайбатнан нурну дулар варишварихъанди аку апІуру, ва дуларик гучІ кабхъру. 10 Малайикди дулариз гъапи: «ГучІ мапІанай, узу учвуз вари халкъ шад апІру ужуб хабар дубхназа: 11 Фицики гъи Давудрин шагъриъ учву гунгъариккан азад АпІрур, Агъа Месигъ бабкан гъахъну. 12 Магъа учвуз мидин лишанра: учвуз, ччаппаригъ гъидиржнади, тІунаъ Бицір дихъидичвуз». 13 Ва сабпну му малайикдин къяляхъди гизаф къадарнаъди жара малайикарра гъафну ва дулари, Аллагъдиз шюкюр апІури, гъамци кІуру: 14 «Аършариин али Аллагъдин ад за ибшри, жилиин Аллагъдиз разивал хурайи инсанарин арайиъ ислягъвал ибшри!» 15 Малайикар дуларихъан завариз гъудучІвиган, марччлихънари чпи-чпиз гъамци кІуру: «Вифлеемдиз душну, душваъ фу гъабхънуш, Агъайи ухъуз фтин гъякънаан баян гъапІнуш, лигухъа». 16 Ва тядивал кади гъафидариз Мар'ямна Юсуф ва тІунахъ хъайи Бицір рякъюру. 17 Дулар гъяркъиган, марччлихънари му Бицірин гъякънаан чпиз малайикди баян гъапІубдикан ктибтуру. 18 Мидкан гъеебхъкъандар вари марччлихънари ктитдариин мюгътал шулу. 19

Хъа Мар'ямди кІуруш, му вари гафар, саб-сабдиин иливури, чан
кІваъ гъюрхну. 20 Марччлихънарра, чпиз малайикди гъапидар чпин
улариз рякъбаз лигну, Аллагъ адлу апІури ва Дугъан тярифар апІури,
къяляхъ хътакуру.